

A Kartla Bier - - Mei Lebenselixier

Viela Leut auf daro Walt,
khenna bluoßna ees - es Gald.
Äß im Laam ümm merra gett,
des kapiern die meistn net.
Do Mensch sollt mehr philosophier !
Unn dozu ghört a Kartla Bier.

Hosta Archo mit do Fraa
un amend wuannosch aa,
bläakt do Mästo, äß en graust,
a Dunnowatto niedosaust.
Loss dich nar net provoziert !
Trink in Ruh a Kartla Bier.

Bist da schüchton un bist ghemmt,
werscht fix ru-ot un bist voklemmt,
gest da amol ausn Haus,
bringst dann kaum a Tönla raus.
Du möchst an schtarkn Max markier ?
Dann trink nar erscht a Kartla Bier !

Bist da jung un host a Määdla,
die wos braucht unto ihtm Kläädla,
host da Angst, äß mit do Zeit,
nümme su gut gett wie heit ?
Willst da dich dann net blamier,
trink dovur a Kartla Bier !

Bist da alt, müchst jünge gsei,
müchst amend noch amol gfrei,
traust dich net su richtig na,
hellst dich für an altn Maa.
Willst da Kraft ho-u wie a Schtier ?
Ölla Toug a Kartla Bier !

Gest da naus in Masknball,
müchst do Krösus gsei im Saal,
müchst gern, äß dich jedo kennt,
jedo grüßt dich, gibt sei Hend.
Merkst da wos? Du sollst schpendier,
jedn Freund a Kartla Bier.

Bist da dick, müchst schlanko gsei,
passt in kenno Hu-os mehr nei,
brauchst zwää Schtüll zum sitzn,
kümmst gleich nei es schwitzn.
Loss es schlemma, ro-ut ich dir,
trink dofür a Kartla Bier

Bist da dörr, mehr kalt als hääß,
innafett als wie a Gääß.
Jedes Windla blest dich ümm,
nergends kriegst dar mehr die Krümm.
Do-u mei Rat : Haab nei für vier,
un dozu viel Kartla Bier!

Bist da müd un ghasst net gschlo-uf,
ziehst die ganze Nacht durch Scho-uf.
Zittoscht früh wie Eschpa - Laab,
bist in ganzn Toug wie daab.
Hopfn hilft, des soug ich dir,
un dan hott jeds Kartla Bier !

Mußt da owo Auto fohr,
brauchst dein Karrn es ganze Johr,
brauchst's für Mutto, Kind un Fraa,
un amend boruflich aa.
Dou soll mo liebo nex riskier.
In dam Fall blu-oß a Schnittla Bier !